

Proxecto de Decreto [REDACTED], do [REDACTED], polo que se regula o Rexistro Electrónico Xeral de Apoderamentos de Galicia e o Rexistro autonómico de persoas titulares de determinados órganos ou cargos.

O artigo 27.5 do Estatuto de Galicia establece como competencia exclusiva da Comunidade Autónoma as normas procesais e procedementos administrativos que deriven da organización propia dos poderes públicos.

Pola súa banda, o artigo 6.1 da Lei 39/2015, do 1 de outubro, do Procedemento Administrativo Común das Administracións Públicas, establece que a Administración Xeral do Estado, as Comunidades Autónomas e as Entidades Locais disporán dun rexistro electrónico xeral de poderes no que deberán inscribirse, polo menos, os de carácter xeral outorgados apud acta, presencial ou electronicamente por quen teña a condición de interesado nun procedemento administrativo a favor dun representante para actuar no seu nome ante as Administracións Públicas.

Con posterioridade, a Lei 4/2019, do 17 de xullo, de administración dixital de Galicia, crea no seu artigo 40 o Rexistro Electrónico Xeral de Apoderamentos de Galicia coas funcións que establece o artigo anterior, sinalando no artigo 119.3 que terá a consideración de utilización obrigatoria para as entidades do sector público autonómico. Igualmente no artigo 41 crea o rexistro autonómico no que constarán as persoas titulares de determinados órganos ou cargos coa finalidade de simplificar o trámite relativo á acreditación da representación.

Pola súa parte, a Disposición Transitoria Segunda da Lei 4/2019, do 17 de xullo, de administración dixital de Galicia, sinala que o funcionamento efectivo do Rexistro de Apoderamentos de Galicia, producirase na data que se determine no desenvolvemento regulamentario, que se materializa neste decreto, en todo caso antes da data de entrada en vigor da regulación contemplada na Lei 39/2015, de 1 de outubro, do procedemento Administrativo Común das Administracións Públicas.

A posta en funcionamento do Rexistro Electrónico Xeral de Apoderamentos de Galicia vai en consonancia con o establecido na Lei 1/2015, do 1 de abril, de garantía da calidade dos servizos públicos e da boa administración, moi especialmente co sinalado no seu artigo 2.1, no sentido de que a cidadanía ten dereito a que se lle garanta a prestación duns servizos públicos de calidade sobre a base da proximidade, a eficiencia, a eficacia e a transparencia, e no artigo 6, que no seu apartado 1 no que describe a atención á cidadanía como o conxunto de medios que o sector público autonómico pon a disposición dos cidadáns e cidadás para lles facilitar o exercicio dos seus dereitos, o cumprimento das súas obrigas e o acceso aos servizos públicos.

O obxectivo fundamental desta norma é cumprir con o sinalado nas disposicións anteriores e desenvolver o funcionamento dos dous rexistros creados pola Lei 4/2019, do 17 de xullo, de administración dixital de Galicia, establecendo desta forma unha nova comunicación entre a Administración e a cidadanía, facilitando unhas relacións máis amplas e máis fluídas e permitindo que terceiras persoas, neste caso o representante ou representantes, poidan actuar directamente en nome doutra persoa para unha xestión máis segura dos seus dereitos e máis áxil das súas pretensións.

Este decreto consta de 27 artigos, distribuídos en tres capítulos, catro disposicións adicionais, tres disposicións derradeiras e sete anexos. No capítulo I, denominado disposicións xerais, consta o obxecto do decreto, o ámbito de aplicacións e a titularidade. O capítulo II, denominado Rexistro Electrónico Xeral de Apoderamentos de Galicia, consta de catorce artigos, que regulan as diferentes tipoloxías de poderes susceptibles de inscrición, en función do alcance das facultades outorgadas ao representante, o que fai que o poderamento teña unhas especificacións diferentes para cada caso e que é necesario regular detalladamente; o resto dos artigos desta capítulo fan referencia ao

procedemento de inscrición e a vixencia dos poderes outorgados. No capítulo III do decreto, que consta de dez artigos, regúlase o rexistro autonómico no que constarán as persoas titulares de determinados órganos ou cargos, cumprindo desta forma co establecido no artigo 41.4 da Lei de administración dixital de Galicia. Esta regulación ten como finalidade simplificar o trámite relativo á acreditación das persoas inscritas, na súa condición de titulares de tales órganos ou cargos, cando actúen en representación dunha entidade poden acreditar a representatividade mediante a acreditación da inscrición neste rexistro. O articulado deste capítulo regula as persoas e cargos inscribibles, o contidos dos asentos, as forma de inscrición, procedemento para a inscrición e vixencia dos asentos.

Na súa virtude, por proposta do Vicepresidente e Conselleiro de Presidencia, Administracións Públicas e Xustiza e do Conselleiro de Facenda e de acordo co ditame do Consello Consultivo e logo da deliberación do Consello da Xunta de Galicia na súa reunión do día

DISPOÑO:

CAPÍTULO I

DISPOSICIÓNS XERAIS

Artigo 1. *Obxecto.*

1. Este decreto ten por obxecto a regulación do Rexistro Electrónico Xeral de Apoderamentos de Galicia, no que se deberán inscribir, alo menos, os de carácter xeral outorgados apud acta, presencial ou electrónicamente, por quen ostente a condición de interesado nun procedemento administrativo a favor de representante para actuar no seu nome ante as Administracións públicas, e que foi creado polo artigo 40 da Lei 4/2019, do 17 de xullo, de administración dixital de Galicia.
2. Igualmente se regula o Rexistro autonómico no que constarán as persoas titulares de determinados órganos ou cargos, creado polo artigo 41 da Lei 4/2019, do 17 de xullo, de administración dixital de Galicia.

Artigo 2. *Ámbito de aplicación.*

1. Este decreto será de aplicación ao sector público autonómico, integrado, de acordo co artigo 3 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, pola Administración xeral e polas entidades instrumentais.
2. Malia o establecido no apartado anterior, non serán aplicables ás entidades instrumentais de dereito privado previstas na alínea b) do artigo 45 da Lei 16/2010, do 17 de decembro, aqueles preceptos que non resulten de aplicación en atención á natureza das ditas entidades e ao réxime xurídico a que deban quedar sometidas as concretas funcións desenvolvidas por elas.

Artigo 3. *Titularidade.*

Corresponderalle á consellaría con competencias en materia de administracións públicas a titularidade do Rexistro Electrónico Xeral de Apoderamentos de Galicia e do rexistro autonómico de persoas titulares de determinados órganos ou cargos.

CAPÍTULO II

Rexistro Electrónico Xeral de Apoderamentos de Galicia

Artigo 4. *Poderes inscribibles.*

De conformidade co sinalado no artigo 6.4 da Lei 39/2015, do 1 de outubro, do Procedemento Administrativo Común das Administracións Públicas, no Rexistro electrónico xeral de poderes poderán inscribirse as seguintes tipoloxías de poder:

- a) Un poder xeral para que o apoderado poida actuar en nome do poderdante en calquera actuación administrativa e ante calquera Administración. O modelo normalizado de formulario para a inscrición está incluído no Anexo I.
- b) Un poder para que o apoderado poida actuar en nome do poderdante en calquera actuación administrativa ante a Administración xeral da Xunta de Galicia ou ante unha entidade instrumental concreta das que lle é de aplicación este Decreto. O modelo normalizado de formulario para a inscrición está incluído no Anexo II .
- c) Un poder para que o apoderado poida actuar en nome do poderdante unicamente para a realización de determinados trámites especificados no poder. O modelo normalizado de formulario para a inscrición está incluído no Anexo III.

Artigo 5. *Acceso ao rexistro.*

O Rexistro electrónico xeral de poderes de Galicia estará dispoñible na sede electrónica da Xunta de Galicia, <https://sede.xunta.gal>, onde constará, cando menos, a relación dos trámites e procedementos da Guía de procedementos e servizos que poden ser obxecto de poderamento. Así mesmo, as persoas interesadas poderán consultar os poderes inscritos nos que figuren como outorgantes ou apoderados e o alcance de cada un deles.

Artigo 6. *Contido.*

O contido que deberá figurar en cada asento practicado será o seguinte:

- a) Datos identificativos do poderdante: nome e apelidos ou denominación ou razón social; documento nacional de identidade, número de identificación fiscal ou documento equivalente.
- b) Datos identificativos do apoderado: nome e apelidos ou denominación ou razón social; documento nacional de identidade, número de identificación fiscal ou documento equivalente.
- c) Data e número da inscrición.
- d) Período de tempo que establece para a vixencia do poder.
- e) Tipo de poder segundo as facultades que outorgue e consonte as tipoloxías sinaladas no artigo 4 deste decreto. No caso de que o poder corresponda ás tipoloxías contempladas nas letras b) ou c) do artigo 4, no asento constará a información sobre as entidades ou trámites aos que se circunscriba o poderamento.
- f) No seu caso, aqueles documentos electrónicos acreditativos das circunstancias tidas en conta na solicitude de inscrición.

- g) Indicación sobre se o poder conferido foi aceptado explicitamente polo apoderado ou non, e en que data.

Artigo 7. Requisitos para a inscrición dos apoderamentos.

Para a inscrición dos apoderamentos serán precisos os seguintes requisitos:

- a) A solicitude de inscrición realizada polo poderdante. Cando a solicitude de inscrición se realice por medio de representante deberá acreditarse a suficiencia da dita representación.
- b) Cando o apoderado sexa unha persoa xurídica nos seus estatutos debe estar prevista a súa capacidade de actuar como representante.

Artigo 8. Forma e lugar de presentación das solicitudes de inscrición.

1. Cando o poderdante sexa unha persoa física, a solicitude de inscrición de apoderamentos poderá presentarse das seguintes formas:

- a) Mediante comparecencia do poderdante na sede electrónica da Xunta de Galicia, <https://sede.xunta.gal>.
- b) Mediante comparecencia persoal do poderdante nalgunha das oficinas de atención á cidadanía e de rexistro.
- c) Mediante comparecencia persoal do apoderado nalgunha das oficinas de atención á cidadanía e de rexistro, achegando un poder previamente outorgado mediante documento público ou documento privado con sinatura lexitimada notarialmente.

2. Cando o poderdante sexa unha persoa xurídica ou ente sen personalidade, a solicitude de inscrición de apoderamentos poderá presentarse das seguintes formas:

- a) Mediante comparecencia dun representante legal da persoa poderdante na sede electrónica da Xunta de Galicia, <https://sede.xunta.gal>, cun sistema de identificación electrónica que o acredite como representante legal da persoa poderdante.
- b) Mediante comparecencia persoal do representante legal da entidade poderdante nalgunha das oficinas de atención á cidadanía e de rexistro. Os poderes presentados polo representante legal da entidade para acreditar a súa representación serán incorporados ao Rexistro como un documento electrónico.
- c) Mediante comparecencia persoal do apoderado nalgunha das oficinas de atención á cidadanía e de rexistro, achegando un poder previamente outorgado mediante documento público ou documento privado con sinatura lexitimada notarialmente.

3. As solicitudes de inscrición dos apoderamentos presentaranse mediante os modelos normalizados de formularios que figuran como anexos I, II e III deste decreto, establecidos respectivamente para cada tipoloxía de poderes inscribíbles prevista nos apartados a), b) e c) do artigo 4, e que estarán dispoñibles na sede electrónica da Xunta de Galicia, <https://sede.xunta.gal>.

Artigo 9. Documentación necesaria para a tramitación das solicitudes de inscrición.

As persoas interesadas deberán achegar coa solicitude a seguinte documentación:

1. No caso das modalidades de presentación previstas nos apartados 1.c) e 2.c) do artigo anterior, achegarase o poder outorgado mediante documento público ou documento privado con sinatura lexitimada notarialmente.
2. Cando se apodere a unha persoa xurídica será preciso achegar os seus estatutos para verificar que neles está prevista a súa capacidade de actuar como representante do poderdante.
3. No caso das modalidades de presentación previstas nos apartados 2.b) e 2.c) do artigo anterior será preciso achegar os poderes da persoa física representante que solicita a inscrición.

Artigo 10. Comprobación de datos.

De acordo ao establecido na disposición adicional oitava da Lei Orgánica 3/2018, de 5 de decembro, de Protección de Datos Persoais e garantía dos dereitos dixitais respecto á potestade de verificación das Administracións Públicas, para a tramitación das solicitudes consultarase os datos incluídos nos seguintes documentos elaborados polas Administracións públicas:

- a) DNI, NIF ou NIE da persoa poderdante ou do seu representante
- b) DNI, NIF ou NIE da persoa apoderada

Excepcionalmente, no caso de que algunha circunstancia imposibilitase a obtención dos citados datos poderase solicitar ás persoas interesadas a presentación dos documentos identificativos correspondentes.

Artigo 11. Aceptación do apoderamento pola persoa apoderada.

A aceptación do apoderamento pola persoa apoderada poderá realizarse en calquera momento anterior á finalización da vixencia inicialmente establecida polo poderdante das seguintes formas:

1. Cando o apoderado sexa unha persoa física:
 - a) Mediante comparecencia do apoderado na sede electrónica da Xunta de Galicia, <https://sede.xunta.gal>.
 - b) Mediante comparecencia persoal do apoderado nalgunha das oficinas de atención á cidadanía e de rexistro.
 - c) Cando as solicitudes de inscrición se realicen segundo o previsto na alínea b) do artigo 8.1 ou na alínea b) do artigo 8.2, poderase acreditar a aceptación da persoa proposta como apoderada mediante a sinatura desta no recadro previsto para estes efectos no modelo de solicitude.
2. Cando o apoderado sexa unha persoa xurídica ou ente sen personalidade:
 - a) Mediante comparecencia dun representante legal da persoa apoderada na sede electrónica da Xunta de Galicia, <https://sede.xunta.gal>, cun sistema de identificación electrónica que o acredite como representante legal da persoa apoderada.

- b) Mediante comparecencia persoal do representante legal da entidade apoderada nalgunha das oficinas de atención á cidadanía e de rexistro.
- c) Cando as solicitudes de inscrición se realicen segundo o previsto na alínea b) do artigo 8.1 ou na alínea b) do artigo 8.2, poderase acreditar a aceptación da persoa proposta como apoderada mediante a sinatura do representante legal desta no recadro previsto para estes efectos no modelo de solicitude.

Artigo 12. Tramitación das solicitudes de inscrición.

1. A inscrición dos apoderamentos no rexistro realizarase mediante actuación administrativa automatizada nos casos en que podan comprobarse automaticamente todos os requisitos necesarios para a inscrición.

2. De non poder comprobar automaticamente os requisitos, antes de efectuar a inscrición o órgano competente analizará a documentación presentada e poderá solicitar un informe sobre a suficiencia dos poderes e demais documentación xustificativa da personalidade ou da representación.

Unha vez analizada a documentación o órgano competente procederá a efectuar a inscrición no rexistro se esta é correcta, ou, de ser o caso, a requirirlle ao solicitante a emenda dos defectos detectados na documentación ou a denegar a inscrición sinalando a causa na que se fundamenta.

Artigo 13. Vixencia dos poderes.

1. Os poderes inscritos no Rexistro Electrónico Xeral de Apoderamentos de Galicia terán unha validez máxima de cinco anos contados dende a data de inscrición.

2. No caso de que o poder fora outorgado por un período inferior aos cinco anos, o poderdante poderá prorrogalo, sempre que non supere o prazo máximo de validez que se sinala no apartado anterior.

2. Durante o período de vixencia do poder o poderdante deberá manter actualizada a información dos apoderamentos inscritos no Rexistro, modificando, no seu caso, o alcance dos apoderamentos para axustalos á realidade da súa vontade de outorgar a representación.

Artigo 14. Revogación e renuncia do apoderamento.

Durante o tempo de vixencia da inscrición do poder o poderdante poderá revogalo e o apoderado poderá renunciar á representación.

A renuncia do apoderado a un apoderamento inscrito no rexistro regulado no presente Decreto, ou a revogación do mesmo polo poderdante, surtirá efectos desde a comunicación fehaciente ao órgano competente.

A revogación e a renuncia deberán realizarse utilizando os formularios normalizados incluídos como Anexos IV e V, que estarán dispoñibles na sede electrónica da Xunta de Galicia (<https://sede.xunta.gal>).

Artigo 15. Validez dos apoderamentos.

1. A representación ante as entidades do sector público autonómico que se sinalan no artigo 2 deste Decreto poderá acreditarse a través da súa inscrición no Rexistro Electrónico Xeral de Apoderamentos de Galicia.
2. Os poderes inscritos no Rexistro só surtirán efectos respecto dos trámites e procedementos aos que expresamente se refira o poder outorgado.
3. Para aqueles trámites e actuacións nos que o órgano ou entidade competente considere imprescindible a aceptación do poder pola persoa apoderada, os poderes surtirán efectos só se a dita aceptación consta na inscrición.

Artigo 16. Consultas e certificacións para as persoas interesadas.

1. O Rexistro Electrónico Xeral de Apoderamentos de Galicia non ten carácter público, polo que as persoas interesadas só poderán acceder á información dos poderes nos que sexan poderdante ou apoderada.
2. As consultas e certificacións poderán obterse por medios electrónicos, e a persoa interesada poderá empregar os sistemas de identificación previstos no artigo 9 da Lei 39/2015, do 1 de outubro, admitidos pola administración autonómica. Estas opcións estarán dispoñibles na sede electrónica da Xunta de Galicia (<https://sede.xunta.gal>).

Artigo 17. Dispoñibilidade da información para as administracións públicas.

A información contida no Rexistro Electrónico Xeral de Apoderamentos de Galicia estará dispoñible para os órganos da administración xeral e do sector público autonómico e para as entidades e administracións públicas nas que os ditos poderes sexan de aplicación.

CAPÍTULO III

REXISTRO AUTONÓMICO DE PERSOAS TITULARES DE DETERMINADOS ÓRGANOS OU CARGOS

Artigo 18. Persoas e cargos inscribíbles

De acordo co sinalado no artigo 41 da Lei 4/2019, do 17 de xullo, de administración dixital de Galicia, neste rexistro constarán:

- a) As persoas que ocupen o cargo da alcaldía dos concellos de Galicia e a presidencia das deputacións provinciais de Galicia.
- b) As persoas titulares dos órganos das administracións públicas galegas e das entidades vinculadas ou dependentes destas cuxo nomeamento sexa publicado no Diario Oficial de Galicia ou no boletín oficial correspondente.
- c) As persoas que ocupen a dirección dun centro educativo público autonómico, dunha delegación da Xunta de Galicia no exterior, das universidades públicas do Sistema universitario de Galicia ou dun centro de investigación ou tecnolóxico da Comunidade Autónoma de Galicia.
- d) As persoas representantes das entidades galegas asentadas fóra de Galicia e inscritas no Rexistro da Galeguidade.

e) As persoas titulares doutros cargos non incluídos nas alíneas anteriores cando resulte de interese para os fins que motivan a creación deste rexistro, e que así se determinen regulamentariamente.

Artigo 19. *Contido dos asentos.*

O contido que deberá figurar en cada asento practicado será o seguinte:

- a) Datos identificativos da persoa titular do órgano ou cargo público: Nome e apelidos, documento nacional de identidade, número de identificación fiscal ou documento equivalente.
- b) Datos identificativos do órgano, administración ou entidade: denominación, número de identificación fiscal, código único identificativo do órgano e tipoloxía de entidade
- c) Cargo que ocupa
- d) Vixencia, se é o caso, do cargo
- e) Data e número da inscrición
- f) No seu caso, aqueles documentos electrónicos acreditativos da titularidade, ou referencia ao boletín oficial ou documento acreditativo do seu nomeamento.

Artigo 20. *Formas de inscrición.*

1. A inscrición das persoas titulares realizarase de oficio nos seguintes casos:

- a) As persoas que ocupen o cargo da alcaldía dos concellos de Galicia e a presidencia das deputacións provinciais de Galicia serán inscritas de oficio pola consellería con competencias en materia de relacións coa administración local.
- b) As persoas titulares dos órganos das administracións públicas galegas e das entidades vinculadas ou dependentes destas cuxo nomeamento sexa publicado no Diario Oficial de Galicia e as persoas que teñan a dirección dunha delegación da Xunta de Galicia no exterior serán inscritas de oficio pola consellería con competencias en materia de administracións públicas.
- c) As persoas que teñan a dirección ou exerzan outros cargos no equipo directivo dun centro educativo público autonómico serán inscritas de oficio pola consellería da que dependan.
- d) As persoas que teñan a dirección das universidades públicas do Sistema universitario de Galicia serán inscritas de oficio pola consellería con competencias en educación universitaria.
- e) As persoas representantes das entidades galegas asentadas fóra de Galicia e inscritas no Rexistro da Galeguidade serán inscritas de oficio polo centro directivo con competencias en materia de emigración.

2. Sempre que sexa posible, a inscrición de oficio realizarase automaticamente a través de mecanismos de interoperabilidade cos rexistros ou sistemas que manteñan a información da titularidade.

3. As entidades ou organismos non incluídos no número 1 deste artigo poderán solicitar a inscrición das persoas titulares a través do modelo normalizado incluído como Anexo VI, que estará dispoñible na sede electrónica da Xunta de Galicia (<https://sede.xunta.gal>).

Artigo 21. Forma e lugar de presentación das solicitudes de inscrición.

As solicitudes de inscrición recollidas no artigo 20.3 presentaranse obrigatoriamente por medios electrónicos a través do formulario normalizado dispoñible na sede electrónica da Xunta de Galicia, <https://sede.xunta.gal>.

Se algunha das entidades ou organismos presenta a súa solicitude presencialmente, requiriráselle para que a emende a través da súa presentación electrónica. Para estes efectos, considerarase como data de presentación da solicitude aquela na que fose realizada a emenda.

Artigo 22. Documentación necesaria para a tramitación das solicitudes de inscrición.

As persoas interesadas deberán achegar coa solicitude a documentación acreditativa da titularidade do órgano ou cargo ou do nomeamento segundo a normativa vixente en cada caso.

Artigo 23. Comprobación de datos.

Para a tramitación de inscricións consultarase automaticamente os datos incluídos nos seguintes documentos elaborados polas Administracións públicas:

- a) NIF da administración ou entidade
- b) DNI, NIF ou NIE da persoa titular do órgano ou cargo público

Excepcionalmente, no caso de que algunha circunstancia imposibilitase a obtención dos citados datos poderase solicitar ás persoas interesadas a presentación dos documentos identificativos correspondentes.

Artigo 24. Actualización da información no rexistro.

1. Os órganos e entidades competentes para as inscricións de oficio previstas no artigo 20.1 serán responsables de manter a información dos rexistros que realizaron permanentemente actualizada dende o momento no que teñan constancia de calquera cambio.

2. As entidades e administracións das que dependan os cargos rexistrados as que fai referencia o artigo 20.3 son responsables de manter actualizada a información dos asentos do rexistro. No caso de que algúns dos seus cargos fosen inscritos de oficio a actualización no rexistro pode substituírse pola comunicación correspondente ao órgano ou entidade competente para a inscrición de oficio da tipoloxía do cargo segundo as canles establecidas pola normativa vixente.

Artigo 25. Cancelación da inscrición.

Durante o tempo de vixencia da inscrición tanto a persoa titular do órgano ou cargo público como o órgano, administración ou entidade que figuren nun asento do rexistro poderán solicitar a cancelación deste a través do modelo normalizado incluído como Anexo VII, que estará dispoñible na sede electrónica da Xunta de Galicia (<https://sede.xunta.gal>).

Artigo 26. Consultas e certificacións para as persoas interesadas.

1. O Rexistro electrónico autonómico de persoas titulares de órganos ou cargos públicos non ten carácter público, polo que só poderán acceder á información as persoas que teñan a condición de interesadas.
2. As consultas e certificacións poderán obterse por medios electrónicos, e a persoa interesada poderá empregar os sistemas de identificación previstos no artigo 9 da Lei 39/2015, do 1 de outubro, do Procedemento Administrativo Común das Administracións Públicas, admitidos pola administración autonómica. Estas opcións estarán dispoñibles na sede electrónica da Xunta de Galicia (<https://sede.xunta.gal>).

Artigo 27. Dispoñibilidade da información para as administracións públicas.

A información do rexistro estará dispoñible para as entidades e administracións públicas nas que as persoas inscritas, na condición de titulares de órganos ou cargos, podan actuar, conforme a normativa aplicable, en representación da entidade que conste no rexistro.

Disposición adicional primeira. Adhesión ao Rexistro Electrónico Xeral de Apoderamentos de Galicia e ao rexistro autonómico de persoas titulares de órganos ou cargos públicos.

En aplicación do disposto no artigo 129 da Lei 4/2019, do 17 de xullo, de administración dixital de Galicia, os órganos estatutarios e consultivos da Comunidade Autónoma de Galicia, as entidades locais e as universidades públicas do ámbito territorial da Comunidade Autónoma de Galicia, así como os organismos ou entidades vinculados ou dependentes deles poderán adherirse ao uso do Rexistro Electrónico Xeral de Apoderamentos de Galicia. Esta adhesión formalizarase mediante a publicación no *Diario Oficial de Galicia* dunha resolución adoptada polo órgano encargado da xestión do Rexistro.

Disposición adicional segunda. Interoperabilidade

1. O Rexistro Electrónico Xeral de Apoderamentos de Galicia será plenamente interoperable nos termos do artigo 6.2 da Lei 39/2015, do 1 de outubro, do procedemento administrativo común das administracións públicas.
2. O Rexistro Electrónico Xeral de Apoderamentos de Galicia permitirá comprobar validamente a representación de quen actúe en nome dun terceiro ante as entidades do sector público autonómico ás que lle é de aplicación este decreto ou ante ás entidades adheridas ao rexistro mediante a consulta doutros rexistros de poderes, do rexistro mercantil, do da propiedade, e dos protocolos notariais, sempre que a súa consulta estea dispoñible nas condicións axeitadas de interoperabilidade.
3. Os poderes xerais, correspondentes á tipoloxía establecida no artigo 6.4.a) da Lei 39/2015, do 1 de outubro, do procedemento administrativo común das administracións públicas, inscritos nun rexistro electrónico de poderes de calquera administración pública serán válidos para que o apoderado poida actuar en nome do outorgante en calquera actuación administrativa e ante calquera das entidades incluídas no artigo 2 deste decreto ou as que se adhiran a el.
4. O rexistro autonómico de persoas titulares de órganos ou cargos públicos será plenamente interoperable

Disposición adicional terceira. Actualización de modelos normalizados.

Os modelos normalizados publicados nos Anexos I, II, III, IV, V e VI poderán ser modificados co obxecto de mantelos actualizados e adaptados á normativa vixente. A estes efectos, será suficiente a publicación destes modelos adaptados ou actualizados na sede electrónica da Xunta de Galicia, onde estarán permanentemente accesibles para todas as persoas interesadas.

Disposición adicional cuarta. *Información básica sobre protección de datos persoais.*

1. Os datos persoais recadados na xestión dos rexistros regulados neste decreto serán tratados na súa condición de responsable pola Xunta de Galicia – Consellería de Presidencia, Administracións Públicas e Xustiza coas finalidades de levar a cabo a tramitación administrativa que se derive da xestión deste procedemento e a actualización da información e contidos da carpeta cidadá.
2. O tratamento dos datos baséase no cumprimento dunha misión de interese público ou no exercicio de poderes públicos, conforme ao establecido na Lei 39/2015, do 1 de outubro, do procedemento administrativo común, e na Lei 4/2019, do 17 de xullo de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia nos formularios de recollida dos datos.
3. Os datos serán comunicados ás Administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.
4. As persoas interesadas poderán acceder, rectificar e suprimir os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en [https:// www.xunta.gal/proteccion-datos-persoais](https://www.xunta.gal/proteccion-datos-persoais).

Disposición derradeira primeira. *Adaptación técnica dos sistemas electrónicos da Xunta de Galicia ao Rexistro Electrónico Xeral de Apoderamentos de Galicia.*

No prazo de 2 anos dende a entrada en vigor deste decreto, os sistemas electrónicos preexistentes no ámbito do sector público autonómico deberán adaptarse tecnicamente para admitir como medio de acreditación da representación para a realización de trámites electrónicos a inscrición no Rexistro Electrónico Xeral de Apoderamentos de Galicia.

Os sistemas electrónicos que xa dispoñan de rexistros particulares de poderes, ou sistemas equivalentes, de ámbito limitado ao propio sistema e para a realización de trámites específicos deste, seguirán mantendo a súa validez.

Disposición derradeira segunda. *Habilitación normativa*

Facúltase ás persoas titulares da consellería competente en materia de administración electrónica e da consellería competente en materia de administracións públicas para ditar as disposicións necesarias para o desenvolvemento deste decreto, no relativo á organización e ás materias propias dos seus respectivos departamentos.

Disposición derradeira terceira. *Entrada en vigor.*

Este decreto entrará en vigor aos vinte días hábiles da súa publicación no *Diario Oficial de Galicia*.